

# Aktiviti Belajar Bahasa Ibunda di Rumah 3

Ibu bapa yang dihormati

Anda boleh menyokong pembelajaran dan pembangunan bahasa Ibunda anak anda di rumah dengan aktiviti-aktiviti saranan yang berikut. Aktiviti-aktiviti ini dapat melibatkan anak anda melalui bermain dan meneroka. Selain memupuk interaksi yang berkualiti dengan anak anda, aktiviti-aktiviti ini juga dapat membantu ahli keluarga mengeratkan hubungan.

**Apakah yang boleh anda lakukan bersama anak anda?**

## Unjuk dan Ujar

Berikan anak anda melihat gambar-gambar keluarga di acara keramaian seperti di majlis perkahwinan, sambutan hari raya ataupun hari lahir. Ajak anak anda untuk melakukan aktiviti unjuk dan ujar mengenai ahli keluarga yang mereka kenal. Ibu bapa juga boleh tanya soalan seperti:

- Awak kenal ini siapa? (datuk, nenek, mak cik, pak cik, sepupu)
- Apakah perasaan awak berada di acara keramaian ini?
- Apa yang berlaku di gambar ini?

Lanjutkan lagi perbualan bersama anak anda dengan soalan-soalan untuk memupuk interaksi dan penggunaan Bahasa Melayu dalam perbualan.

## Buku Kegemaran Saya

Ajak anak anda pilih buku yang mereka suka. Bimbing anak anda dengan bertanyakan soalan tentang gambar-gambar yang mereka lihat di buku.

Baca buku bersama-sama dan tanyakan soalan yang berkaitan dengan buku itu.

## Permainan Memori

Objektif permainan memori membantu anak anda mengingati kosa kata tentang keluarga yang telah mereka pelajari. Sediakan 2 kertas A4 yang telah digunting kepada enam bahagian. Lukiskan gambar dan tulis perkataan sepupu, pak cik, mak cik, datuk dan nenek di setiap kertas kecil itu. Letakkan kertas kecil itu di meja. Cari kad gambar yang sama dan padankan. Ajak anak anda untuk menyebutkan perkataan yang tertera di situ. Anak anda boleh simpan kertas yang mempunyai gambar yang sama.



## Gol!

Objektif pelajaran ini adalah untuk membantu anak anda mengenal suku kata 'pa' dan 'pi'. Sediakan dua bakul atau bekas dan lekatkan kertas yang ditulis suku kata tersebut. Bimbing anak anda untuk campakkan bola yang diperbuat dari suratkhbar ke dalam bakul. Sebutkan suku kata yang tertera. Anak anda juga boleh menyebut perkataan yang bermula dengan suku kata tersebut seperti 'pasu', 'pinggan' dan 'paku'.



**Berseronoklah bersama anak anda!**